

PAGTULON-AN 11 - USA KA BUKID MILANDONG SA DALAN SA SAAD

Exodo 15 - 32

TEMA: Pagpakita nganong gihatag sa Dios ang Kasugoan ug kang kinsa kini gihatag.

Nakakita ka na ba ug bukid? Gikan sa halayo, mura lang kini ug gamay nga bungtod, apan samtang ikaw magakaduol, kini mahimong daku na kaayo. Karon sa magasunod kita sa Israel, muabut kita sa Bukid sa Sinai nga dunay duha ka libo ug duha ka gatus kawaloan ug lima (2,285) metros kataas. Imong madunggan unsa kini ka makahadlok nga bukid, kini naga-aso, ug ang Dios nakigsulti kang Moises niining maong bukid. Taas na kaayong panahon sa diha nga ang Israel miagi sa landong niining maong bukid.

Ang mga Israelitas niining maong panahon, diha na sa dalan paingon sa SAAD NGA YUTA. Ang Dios magasulay sa Iyang mga katawhan aron sa pagsuta kon sila ba andam sa pagdawat ug pagdumala sa yuta nga Iyang gisaad kang Abraham, Isaac, ug kang Jacob. Gusto usab sa Dios nga ipamatuod sa Israel nga sila nagkinahanglan Kaniya sa ilang pagpanaw.

Human ang Israel mitabok sa Mapulang Dagat, miabut sila sa kamingawan sa Shur, Exodo 15:22. Gikan dinhi ang mga pagsulay nagsugod sa pag-abut ngadto kanila:

1. Unang pagsulay: ang mapait nga tubig sa Marah, Exodo 15:22-25. Sa dihang miabut ang Israel sa Marah, dili sila makainom sa tubig sa Marah, kay kini mapait. Ang mga tawo napakyas sa maong pagsulay sa dihang sila nagbagulbol, apan ang Dios nagpabilin nga matinumanon. Ang Dios mipakita kang Moises usa ka kahoy nga Iyang ilabay ngadto sa mga tubig ug ang tubig nahimong matam-is. Ang maong kahoy nagahulagway kang Cristo nga mohimo sa pait nga tam-is. Si Cristo namatay ibabaw sa kahoy aron makuha ang kapait sa sala.
2. Ika-duhang pagsulay: ang kagutom, Exodo 16:3-21. Didto sa kamingawan sa Sin, ang mga tawo nagbagulbol nausab tungod kay sila gipanggutom. Sila napakyas nausab, apan ang Dios mipamatuod usab sa Iyang pagkamatinumanon ug Siya mipadala kanila ug mana. Ang mana usa ka hulagway ni Cristo, ang Tinapay sa Kinabuhi, Juan 6.
3. Ika-tulong pagsulay: kauhaw didto sa Repidim, Exodo 17:1-7. Gikan sa kamingawan sa Sin, ang mga anak sa Israel nagkampo sa Repidim ug didto walay tubig. Ang mga tawo napakyas nausab pinaagi sa pagbagulbol, apan ang Dios mihatag kanila ug tubig gikan sa bato human kini gitugsok sa sungkod ni Moises. Ang bato mao si Cristo ug ang tubig mao ang Balaang Espiritu, 1 Corinto 10:4 ug Juan 7:37-39. Ang pagtugsok sa bato nagahulagway kang Cristo ingon nga gidughang ug gilansang sa krus sa dihang mianhi Siya sa kalibutan sobra duha ka libo (2,000) katuig na ang milabay. Ang Balaang Espiritu mahimo lamang ikahatag pinaagi sa pagpatay ni Cristo.

Ug unya, ang Israel miabut sa Bukid sa Sinai ug nagkampo sa atubangan sa bukid. Si Moises mitungas na ngadto sa bukid ug ang Dios misulti kaniya nga gusto Niya nga ang mga anak sa Israel, mahimong gingharian sa mga sacerdote o pari ug usa ka balaan nga nasud. Apan kinahanglan nga sila magatuman sa Iyang tingog ug magabantay sa Iyang pakigsaad. Ang tibuok katawhan miuyon sa dihang si Moises misulti kanila ug ang Dios miingon kang Moises nga moadto kaniya diha sa mabagang panganud, aron ang mga tawo nakadungog Kaniya samtang sila nagatindog sa tiilan sa bukid, Exodo 19.

Ang panahon miabut alang sa kinadak-ang pagsulay sa tanan. Ang Dios mosulay sa gugma ug pagtoo sa Israel, pinaagi sa ilang pagtuman sa Kasugoan nga Iyang igahatag kanila. Ang matag-usa nahadlok sa pagkabalaan sa Dios sa dihang nadungog nila ang napulo (10) ka mga sugo sa Balaod. Gusto nila si Moises na lang ang magasulti kanila sa uban pang mga sugo nga igadugang sa mga Saad sa Dios, Exodo 21:1-21. Atong makita nga ang mga balaod sa pagpanaw nga pagahinumdoman sa Israel daghan kayo, Galacia 3:19-25.

Unsa kaha ang imong hunahuna nga gibuhat sa mga tawo samtang si Moises tua sa itaas sa bukid? Ilang gisupak ang unang duha ka mga sugo nga gihatag sa Dios.



Tinubdan: Sweet Publishing – kini ilustrasyon lamang sa Exodo 32:19

Exodo 32, nagatug-an mahitungod sa bulawan nga nating baka, sa kasuko sa Dios, sa pangamuyo ni Moises, ang pagkadugmok sa duha ka papan nga bato uban sa napulo (10) ka mga sugo (Deuteronomio 9:10), ug tulo ka libo (3,000) ka mga Israelitas ang nangamatay.

Ang Israel nakapasar ba sa pagsulay? Wala sila kapasar, ug dili kadto mao ang katapusan sa pagsulay. Ang Dios mihatag kanila daghang mga katuigan ilalum sa Kasugoan apan sila nagabalik-balik sa pagsupak niini. Ang Dios nagdugang sa Kasugoan ngadto sa Iyang mga Saad tungod sa pagkamasal-anon sa Israel. Ang Kasugoan gidugang hangtud sa pag-abut sa Kaliwat nga gisaad apan sila nagatapus sa paglansang sa gisaad nga Kaliwat. Karon, atong makita ngano nga ang Kasugoan gihatag ug unsa ang napamatud-an niini.

Ang Kasugoan gidugang sa Saad tungod sa kalapasan ug mga kasal-anan, Galacia 3:19. Ang Israel nagabalik-balik sa ilang pagpakasala ug wala magahatag pagtagad sa pagkangil-ad sa sala. Ang Kasugoan nagpamatuod nga ang Israel makasasala; sama sa mga Gentil ug walay ikapanghinambog, Roma 3:19-20. Ug ang Kasugoan nagpamatuod nga ang hingpit nga pagkabalaan sa Dios nagakinahanglan sa hingpit nga pagkamatarung, Exodo 20:3-6. Busa, ang bugtong paglaum sa Israel naa lamang sa pagkamatarung sa gisaad nga Kaliwat - ang atong Ginoong Jesu-Cristo, Galacia 3:24.

Ngadto kang kinsa ba gihatag ang Kasugoan? Kini gihatag ngadto sa Israel. Ug ang Kasugoan nalansang sa krus sa Kalbaryo, Colosas 2:14. Ang Kasugoan ba gihatag nganhi kanato nga nagakinabuhi diha sa TUGPAHANAN SA GRASYA? Dili, apan kita makakat-on gikan sa Kasugoan sama sa mga butang nga nakat-onan sa Israel. Kita mga mahuyang ug makasasala dinhi sa atong kaugalingon. Ang Dios nangita sa hingpit nga pagkamatarung. Ang hingpit nga pagkamatarung ato lamang maangkon pinaagi sa pagsalig sa Ginoong Jesu-Cristo, ingon nga kaugalingong Manluluwas gikan sa impiyerno. Ang pagpaningkamot sa pagtuman sa Kasugoan dili gayud makaluwas kang bisan kinsa, apan ang pagsalig sa nahuman nga buhat ni Cristo didto sa krus magaluwas kang bisan kinsa nga motoo Kaniya.

SAG-ULOHON NGA BERSIKULO: “Nan, ngano pa man ang kasugoan? Kini sa kaulahiay gidugang gumikan sa mga kalapasan, hangtud muabut ang kaliwat kang kinsa gihimo ang saad; ug kini gipasiugdahan sa mga manolunda pinaagi sa usa ka tigpataliwala.” Galacia 3:19.

PAGTULON-AN 11 – BULOHATON

Sa pagpanaw sa mga Israelitas gikan sa Egipto ngadto sa yuta sa Canaan, ang Dios nagasulay kanila ug nagpamatuod kanila kon sila magalakaw ba sa Iyang dalan ug kon sila andam ba sa pagsulod ug pagdumala sa Yutang Gisaad.

Direksyon: Gikan sa Kasulatan, isulat sa ubos kon unsa ang mga pagsulay ug giunsa sa Dios pagtagbo ang ilang mga pagkinahanglan.

1. Exodo 15:22-25 – Sa Marah ang tubig _____. Ang Dios misulti kang Moises sa paglabay ug _____ didto sa mga tubig ug kini nahimong _____.
2. Exodo 16:3-5. Didto sa kamingawan sa _____ ang mga tawo nagahunahuna nga sila mangamatay sa _____, apan ang Dios miingon nga Siya magpaulan ug _____ gikan sa _____.
3. Exodo 17:1-6. Didto sa Repidim sila _____ tungod kay walay _____, apan ang Dios misulti kang Moises sa pagtugsok sa _____ ug ang _____ mitubod.
4. Anaa lamang usa (1) ka tawo nga makatagbo sa atong espirituhanong kagutom ug sa atong espirituhanong kauhaw. Tan-awa ang mga bersikulo sa ubos ug isulat ang ngalan niining maong tawo. Juan 6:35 _____; Juan 4:14 _____.
5. Asa man ang Israel sa diha nga ang Dios mihatag kanila sa daku kaayo nga pagsulay? Exodo 19:1-2 _____.

Ang mga bersikulo sa Bibliya nga makita sa ubos nagatug-an ngano nga gihatag ang Kasugoan. Pangitaa kini ug isulat sa mga linya.

6. Galacia 3:19 – Ang Kasugoan gidugang tungod sa _____.
7. Roma 3:19 – Ang Kasugoan gihatag aron ang _____.
8. Roma 3:19 – Ang Kasugoan gihatag aron ang tibuok kalibutan _____.
9. Unsa man ang gisimba sa Israel sa dihang ilang gisupak ang unang duha (2) ka sa mga sugo ug unsa man ang gibuhay ni Moises? Exodo 32:4,20. _____

_____.
10. Isulat ang Galacia 3:19: _____

_____.